

Vun driveriver

erscheint auf www.lenauheim.de

monatliche
Erscheinung

März 2012

von Helen Alba

„Mir sin stolz, die Worschkoschtprob in Semiklosch zu han!“

Worschtverkoschte am Letschtfaschings-Dienschtach - „Klein, awer fein“! So kann mer im Große die Worschkoschtprob 2012 in Semiklosch bezeichne. Es war mol was ganz annres, als in de letschte Johre. Es is jo es Zeitungsfescht der „Banater Zeitung“ un die Redakteere han sich gedenkt, des Fescht mol näkschter an die Leser zu ricke, die weiter wech vun Temeschwar wohne un noch nie derbei ware. Weil die Semikloscher geere unser „Banater Zeitung“ lese (es git dorte vill Abbonnente), is die Wahl uf die Arankastadt gfall. Un es war e guti Wahl. Die Veranstaltung is im Nako-Kaschtell abghal wore, villi Schwoweleit ware derbei un akar wene dass mer gfroot hat, alli ware prompt der Meinung: „Mir sin stolz, die Worschkoschtprob in Semiklosch zu han!“ Es war natierlich alles in klennerem Rahme, doch gemietlich. Zu esse war meh wie genuch, zu trinke natierlich ach. Vill is verzählt gin iwer de schwowische Brotworscht, der wu beschtens gschmeckt hat.

Was war annerscht? In erschter Reih, dass die Wkp grad uf de Letschtfaschings-Dienschtach gfall un in eem Kaschtell abghal gin is. Zwar gits dorte ke Geischter (wahrscheinlich hat de Gschmack vun geraachtem Brotworscht un Knowl se jetz ganz vertrieb!), doch alles is scheen hergericht. Un mer hat uf de erschte Blick Schwowe gsiehn: Bäsle mit Tiechle ufm Kopp, Männer mit Schnepskappe, rotbackiche Gsichter, die wu vor Freed und Stolz ganz ufgeret ware. Sie han mer verrot, dass se die Wkp nor vum Heere kenne. Doch jetz, wann se derbei sin, kenne se sich selwer e Meinung bilde. Un sin sich vun aller Anfang an sicher, dass derjenich, der die Wkp ingfiehrt hat, e arich gscheiter Schwob gewenn is. Es is nit jetz grad weger em Esse. Mer kummt zamm, kann verzähle, gsieht bekannti un bisher unbekannti Leit. Un sovill Reporter uf eem Haufe, des bedeit, dass es Intresse groß is.

Schun beim Ninkumme ware rechts un links Tische mit Getränke un Kaffee ufgstellt. Mer hat plaudre kenne, Bekannti begriesse un Semikloscher kennelerne. Was e ganz bsundersch scheenei Eindruck hinerloss hat, ware die Kiner un Jugendliche im Semikloscher Trachtegwand. Un dann, wie mer in de Saal ninkumm is, wu die Tische gedeckt ware, hat mer nor staune kenne. Wie immer ware an eem Kleiderständer, der wu mit der „Allgemeini Deitschi Zeitung/Banater Zeitung“ ausgeleet war, die Brotwerscht ufghong. Die Tische han sich geboo vor lauter Keschtlicheite: Brotwerscht natierlich, Lewer- un Blutworscht, Schwartlmaa, Schofkäs, Laibkäs, Saures, Salate, Lezelter in verschiedeni Forme, riesich grossi, rundi Kranzkuche, Nusse- un Maasstrudl, Obst. Mer hat nit gewisst, was mer zuerscht bstaune oder verkoschte soll. Doch alli Gäscht han brav gewart, bis die Ansprachen ghal ware. Sie ware mucksmeischenstill. Un des war etwas wirklich Scheenes. Weil sooft die Wkp im Temeschwarer Adam-Müller-Guttenbrunn-Haus abghal gin is, han die Leit sich beim Tratsche nit steere gelosst, während die Rede gschwung gin sin. Dervun hat mer nix verstehn kenne. Un wie dann die Schurie bstimmt war un anfang hat zu verkoschte un bewerte, han die Gäscht ach zu esse anfang. Ich han niemande gsiehn, der derbei gstuppt oder sich vorgedrängt hätt.

Un dann, wie alli diejeniche, die Worschtprowe gebrung han, vorgelest sin gin, hat mer anri Name gheert, es ware anri Gewinner, nit immer die aus de letschte Johre. Worschtbringer ware aus Semiklosch, Tschanad, Lippa, Bokschan un Temeschwar. De erschte Preis for hausgemachte Worscht hat de Vetter Hans Becker aus Semiklosch gewunn, de zweite Preis Pavel Bornea aus Tschanad (mit Worscht aus Schweine- un Rossfleisch). Un beim dritte Platz, do ware gleich drei Gewinner: Edwin Zaban (Semiklosch), Teodor Gligor (Lippa) un Jozsef Ros-Suba (Tschanad).